

四庫全書

集部

欽定四庫全書

集部

元詩選初集卷五十二

詳校官中書臣王鵬

主事銜臣徐以坤覆勘

總校官編修臣王燕緒

校對官檢討臣溫常綬

謄錄監生臣王同獻

欽定四庫全書

元詩選初集卷五十二

庶吉士顧嗣立編

鄭提學元祐

元祐字明德處州遂昌人其父希遠徙家錢塘  
是時咸淳諸老猶在元祐遍遊其門質疑稽隱  
克然有得以奇氣自負父沒僞居平江學者雲  
集浙省臺憲爭以潛德薦之臂疾不願仕優游  
吳中者幾四十年至正丁酉除平江路儒學教

授一歲移疾去後七年擢江浙儒學提舉居九月卒年七十有三時至正二十四年也明德兒時以乳媪失手致傷右臂比長能左手作楷書規矩備至世稱一絕遂自號尚左生為文章滂沛豪宕有古作者風詩亦清峻蒼古時玉山主人草堂文酒之會名輩畢集記序之作多推屬焉東吳碑碣有不貴館閣而貴其所著者晚年自彙其所作文以授謝徽曰吾在杭亦嘗有作

茲以僞吳久而作之為多故名之曰僞吳集當  
張士誠據平江東南文士多依之者明德最為  
一時耆宿云

出塞七首效少陵

已踰烏盭山未涉狐奴水饑羸形骸黑枕戈待明起將  
軍方踟躕天地入馬箠吾儕亦何人一死等螻蟻

秦時閭左戍漢家弛刑徒髑髏棄瀚海天陰哭嗚嗚我  
非望生還魂魄迷歸途但願戈矢利委身斷狂闕吁嗟

載筆書不紀萬骨枯

受詔武臺宮西遮鈎營道扼虎射命中相從願深討躡  
血焚龍庭以功當橫草平沙列部伍鮮整旄與葆奚慮  
蛇豕繁一鼓櫓槍埽歸取萬戶侯歲月未云老

糒吞天山雪衣裂青海風前行幾千里不見單于宮走  
馬脫轡頭所恃五石弓鄉井豈不懷簡書戒命洪黃塵  
觸壘起勇奮奔貔熊鉛刀異莫邪所覩一割功

騎羊五歲兒出沒區脫中翻身異鳥鼠快捷如飛鴻生

理不土著水草無豐凶一戰那足平燕然方勒功

烽煙邊上發塞鴈羣南翔仰睇冥冥天風緊雨雪霜驅  
馬上厓谷悲笳咽雲黃棄絕骨肉親詎弗懷故鄉軍聲  
動劒戟砲火燒衣裳鞠育非寡思道遠不得將吞咽復  
何憤思虜其名王

邊塵莫猶黑鬼燐出霜草轉戰圖報國寧慮骨枯槁人  
生無百年一斃不待老但願土境富微軀奚足道勲業  
銘旂常秋天氣同杳

明月鏡

神工鑄明鏡持進嫦娥宮  
嫦娥羞鑑容莫挂扶桑東  
浮雲散天風照耀九海空  
如何萬丈光瀉入詩仙胸  
談玄走銀蟾落筆驚彩虹  
掩却星斗文孤輝天地中

贈譚臺史

高昌佳公子氣橫海嶽秋  
玉壺洗零露錦機濯芳洲  
真致埃壙外獨與神明遊  
岵巖鳬鳳臺日晏行雲愁  
帝念南紀大建臺分顧憂  
列聖耳目寄職斯布皇猷  
誰工古



人學可參憲臣謀之子被辟命束書上昇州煌煌三台  
星列宿莫敢儔而子妙折旋婉孌通襟喉不居世祿懿  
遠慕儒術優先正高與馬德言皆可酬骨朽名不泯耿  
光懸斗牛子能勗令聞席珍重天球况復五彩筆盡意  
工冥搜飛花落碁局弱柳維江舟感此時物佳念子何  
能休龍駒少汗血驚馬老益羞白雲高莫和青山曉加  
稠日沒煙樹遠重倚城南樓

送劉長洲

中吳號沃土壯縣推長洲秋糧四十萬民力罷誅求昔  
時兼并家夜宴彈箜篌今乃呻吟聲未語淚先流委肉  
餓虎蹊于今三十秋畝田昔百金爭買奮智謀安知徵  
斂急田禍死不休膏腴不論值低窪寧望酬賣田復有  
獻惟恐不見收日覺鄉胥肥吏臺起高樓坐令力本農  
命輕波上漚天意憫困劇南轅卯金侯侯有萬金劑探  
囊令病瘵甦者起雀躍瘖者言嘲啁坐令百里邑姦回  
息彫鏝是皆仁侯惠頌聲滿道周清朝考功選賞典無

滯留願侯登廊廟一洗蒼生憂

遊鴻禧廢寺聽舊僧心敬言

渡南已四葉繼統屬濟王祀國支圯柱前星掩寒芒幃  
妍肇牝晨奴謀肆鴟張兩藩為義激不顧百口戕起以  
奉其主近在茗水陽天津幹斗杓海底洗日光人非霍  
狄儔誰是涉險航聞其被戮時母老兩鬢霜吐辭語觀  
者令人殊激昂吾見宋忠臣雖死猶不亾至今草間燐  
熒熒出幽房北城鴻禧寺棟宇自蕭梁兩藩舉義日俾

衆聽鐘撞哀哉城門火遽遺池魚殃遂指寺逆地瀝宮  
示非常田斷飯僧粥鑪冷供佛香金像久頽剝青苔重  
悲涼仰懼杌拱墜俯歎榛莽長殘僧四五人饑用篋束  
腸敬也業尤白宴坐不下堂家本屬楊氏能言寺之詳  
補苴罄衣鉢創巨醫難良更今百廿年我來重彷徨潘  
忠世莫雪寺廢人弗傷天高莫之訴題詩空慨慷

送友還鄉

墮地作男兒有用須及早當年懸弧意焉得鄉曲老青

雲一蹉跎鬢髮日已皓常恐歸去遲心焉慙如擣我家  
東吳城翠竹森若葆力耕輸王稅妻子亦溫飽詩成每  
獨咏觴至或共倒富貴將焉如歲晏聊自保蕭蕭風前  
柳賀賀霜下草有官固當歸無官歸亦好

遊惠山寺

百里盡平壤茲山忽中蟠谿谿得宏深紆徐納平寬僧  
坊隱其腹崇構居桓桓立神衛觚稜緣雲置闌干我來  
玄冬交榜舟起微瀾天連黃沙白露委青林丹地無車

馬塵松筠政堅完蒼然後彫意彼此不厭看稍稍涉其  
厓探源汲清寒恭惟桑苧翁出處良獨難帝青九萬里  
冥飛見修翰空留雪泥跡莫究清淨觀煮茗滌煩暑晏  
然有餘歡

姑蘇臺

城西高臺高百尺傳是吳王舊遊迹百花正開西子醉  
明月芳洲照清夕嬌顏如花醉王側城上烏嘯曉星白  
歌鼓聲消醉未消越王已將兵來朝鍬金搗鼓殷天地

兵敗可復棲夫椒吳人遺恨化潮汐莫往朝來箭涇直  
不然自可君甬東何用蕭蕭馬嘶驛

吳桓王墓

有吳桓王之墓田乃在盤門南郭邊墓中玉鳧久化土  
石上赤烏猶紀年寒食無人灑麥飯東風滿地飄榆錢  
功昭前代啟吳祚葬地合擇名山川闔閭城南不百步  
土薄易致耕夫穿昭紘衆臣號詳密慮不及此寧非愆  
緬思山東舉義日郿炷顧已無諸賢惟王父子起相繼

黃星閃避東南天假之修齡定四海許下豈容瞞著鞭  
鑿山掩匠等發掘朽壤一坏誰獨專白楊蕭蕭北邙路  
姓名能得幾人傳

岳武穆王墓

棲霞嶺南湖水陰墓木兩株高百尋鬼神撓護霜雪幹  
日夜怒號風雨音山僧紙錢每自挂隴首金槌那得侵  
精忠既已塞天地英爽尚爾盤山林恨雖無血可化碧  
世故有人能範金恭惟父子一抔土尚想君臣千載心



萬松嶺前行殿廢五國城頭寒漏沈空令遺黎痛至骨  
荒墳一上一哀吟

古牆行

并序

某童時侍先人到杭訪諸故家其數至則循王  
府也府在省西天井巷其北則油車巷也宋諸  
王子孫居之者如蜂房其家粗完則月潤先生  
也先生諱拱與菊存先生兄弟行先人言論孤  
峭尊俎間每謂循王功名去韓岳遠甚特與高

宗意合故享富貴壽考耳其昆季每聞先人抗  
論往往引去今幾五十年杭故家埽地盡矣而  
循王府亦為江浙省官署向年淮陰龔聖予與  
菊存交厚見王府環牆猶堅完知其版築時取  
土于南山其用意遠矣為賦古牆行其詞于王  
多所褒美然豈春秋筆削之謂哉為賦此庶幾  
黃太史浯溪讀碑詩意夫

翠律環牆連數堵宋亡猶是循王府南渡功臣王第一

賜第錢塘貯歌舞築牆遠取南山土軍士肩賴汗流股  
楨榦停勻杵築堅小却猶支三百年當時能留岳忠武  
返旆定可銘燕然嫖姚忘家子胥戮宰嚭賣國身名全  
偷安湖山忘大辱詔諭江南等臣僕蕭牆繚周千柱宮  
只欠甑泥蒸後築帶礪鑄銘在甲第築牆不厭高于屋  
遠鴈秋橫五國城帛書無復淚交傾可憐忠臣痛刻骨  
空令志士死結纓佞顯忠誅誰得失二百年餘昭白日  
舊時每見古牆邊鬼燈夜暗光如漆牆土于今化作灰

欲問故老心先摧只有省牆新築後鼓角聲殷吳山隈

溫日觀畫蒲萄

伊昔錢唐溫日觀醉兀竹輿殊傲岸却將書法畫蒲萄  
張顛草聖何零亂枝枝葉葉點畫間醉瞠白眼看青天  
狂呼大盜楊總統天不汝誅吾厚顏楊加筆死曾不畏  
故老言之淚尚滑畫成蒲萄誰賞識惟有鮮于恒嘖嘖  
醉叩齋室支離疏拊摩悲歌淚填臆鮮于設浴師浣之  
為師滌垢曾弗辭人言結韞張廷尉千載風流寧異茲

蔓如龍鬚實馬乳問師揮毫奚獨取只因漢使遠持來  
野老詩成淚如雨

重題溫日觀蒲萄云故宋狂僧溫日觀醉凭竹輿稱  
是漢以頭濡墨寫蒲萄葉葉枝枝自零亂隴苗時有  
連真玳每欲邀師飲其家路逢其人輒大罵欲泄憤  
怒寧辭過鮮于愛師工字畫北面從師學波磔寫出  
蒲萄皆法書二王楷範從師得困學齋前支離疏師  
來或哭或歌呼醒塗醉抹不可測其言皆足警懦夫  
先生敝廬耿家步阿師舊日經行路月落山空喚  
不膺尚想秋棚溥白露二詩用意略同附記于此

古書行贈吳孟思

蒼頡四目通神明制字以來幾變更籀創大篆豈柱史

石鼓有刻非無徵  
驪珠煌煌幾千顆  
照燭萬世開章程  
周平東遷帝紐解  
甄豐繼出加斫精  
秦斯學荀儒運阨  
獨負小篆起焚坑  
戈森劍列出華玉  
百世是寶堪依憑  
次仲忽挾八分起  
喜動呂政消威稜  
一朝檻車化鶴去  
傳聞無乃非人情  
政方鞭戮海宇日  
程邈繼仲尤知名  
六國滅姬旋自滅  
人如亂麻死長城  
神工異畫先後出  
隸法變篆由邈興  
十年覃思非不苦  
習趨簡便令人輕  
堂堂達門許叔重  
憤悱闕譌復著經  
三才萬物總蒐討

一掣屋部瞻繁星慎于六義功不細朽骨逮今餘德馨  
漢章變草本伯度波磔與隸猶相仍俗書姿媚相扇告  
韓論匪激毋深驚千年陽冰紹斯跡有茂其實蜚英聲  
珪壁煌煌照衰世白馬記與庶子銘兩徐識解更卓特  
著書翼慎言庚庚張侯豹姿編復古金薤琳琅垂九清  
皇元篤生趙文敏埽世糠粃開羣盲龍翔鳳翥彩雲晚  
夾以日馭揚雙旌自公騎箕上天去衆論悉與濮陽生  
生名吳睿孟思字篆隸可寶如璜珩周旋向背盡規矩

分布上下紛縱橫囊錐畫沙泯芒角寶樹出網含光晶  
研裂雲根劒就淬射穿揚葉弓開彳刊題班班滿山石  
姓名往往聞帝京贈言無如胡汲仲我乃蚓竅蠅薨薨  
闔閭城中每相見媿我頭白君眼青長歌哦成三月莫  
妒婦無能空拊膺

送詩僧珩書記

吳僧娟娟珩上人詩如嶽面青嶙峋旁支小山各秀出  
吞雲洩雨千星辰陳高復來說珩好思若美玉蒸芋尹



音浮筠玉  
之光采

我老於詩苦思短援筆欲下仍嚬呻  
奏香擬繞玉皇案放權却入桃源春艱難若此良自笑束燒不  
熱釜底塵如何諸君擅天巧珩也又復能清新百年幾  
見光嶽合四海此喜文章純吾聞桑門重行解言必與  
道無緇磷西風搖落鴈南鄉長歌送子空沾巾

鍾馗部鬼圖

老髯足恐迷陽棘鬼肩藤輿振雙膝前驅肥身兒短黑  
非髯嬌兒則已腊後從衆醜服厮役擔攜鬼脯作髯食

鬼肌未必能肥腠舖之空勞髯手擘彼瘦而巾褶長窄  
無乃癯儒執髯役其餘醜狀千百態專為世人尸辟怪  
楚龔瘠老非其類請問何由識其槩想龔目睛爍陰界  
行屍走鬼非殊派民膏民脂飽死後却供髯餐縮而瘦  
無由起龔問其候有嘯于梁妖莫售大明當天百祿轉  
物不疵癘民長壽

花蝶謠題舜舉畫

花魂迷春招不歸夢隨蝴蝶江南飛碧蕤粉香酣不起

臥帖芳茵唾鉛水癡娥眼嬌錯驚顧解裉戲撲沾零露  
折釵搔首笑相語阿誰芳心同栩栩頰雲流光空影寒  
冰波緘恨唬闌干

漁莊

濠上春晴花朵朵施周強知魚與我爭如顧循讀書倦  
馭沓浪花宵鼓柁船頭列炬船尾唱繩擲如雲翻水上  
并刀斫雪鱸縷飛拍拍茆柴薦新釀莊上東風柳欲絲  
鯉魚吹浪迎歸船由來名教有樂地看書却埽消殘年

雲山高隱圖

大山巖巖如張旗小山偃蹇如牽衣巖頭千仞瀉飛瀑  
迸珠濺雪交橫飛林廬隱隱空中起青紅棟宇相軒委  
中有幽人歌紫芝自采藥苗臨澗洗喬林露下青童童  
交柯老榦森虬龍豈無明堂棟梁柱還當采獻明光宮  
寧知谷底白駒客考槃歌中風落日畫圖難寫西隱蹤  
一曲鸞笙度空碧

東坡赤壁圖

奎星墮地不化石化作盤天老胸臆清禁森嚴著不得  
半夜吹簫過赤壁百億魚龍不敢聽萬古東流月華白

汝陽張御史死節歌

張御史罵賊死國忠臣家孝子忠義國家培植來白日  
照耀黃金臺此身許國誓不二不信白骨生青苔近者  
汝陽妖賊起揮刀殺人丹汝水侯指頭上獬廌冠撐拄  
乾坤立人紀侯頸可斷身可捐義不與賊同戴天皆裂  
齒碎加憤怒髮直上指目炯然賊刀入口鉤侯舌舌斷

含餬罵不絕孤忠既足明丹心三年猶須化碧血顏平  
原張睢陽一日雖短千載長人誰不死死忠義汗簡至  
今名字香朝廷易名賜廟食人誰無心應感激坐令忠  
義銷兇邪鑿井耕田歌帝力

李早馬圖

外甥似舅明昌帝取法宣和尚工伎李早畫馬供奉時  
畫院森森嚴品第冀之北土馬所生早也想見房星精  
遂令龍媒出毫素側胸注目疑嘶鳴紈扇畫三騎郎君

峭鞍轡窄衫繡褱四帶巾靴尖曾踢中州碎紫絨軍敗  
祁連山金鈿玉軸仍南還好事空餘扇頭馬至今拂拭  
塵埃間

金章宗母宋徽宗某公主之女也故明昌書畫悉效宣和

### 贈翰古清

虞公借榻宗鏡堂四衆鄉仰不暫忘古清上人獨見取  
贈以金薤之琳琅公時目眚視貿貿文成欲寫難成行  
殞星著紙廢屬讀風襟露帶斜低昂中言上人善幻化  
神龍千丈一鉢藏蜿蜒委蛇各有態擘雲掣電金蛇光

海濤翻山霹靂碎怒卷河漢如壺漿世人蒿目不敢覷  
師獨摩撫如馴羊神膏點鱗翠鬣舞金篦刮瘼星芒張  
珊瑚千樹宮室祕獻以耆婆未覩之藥方師哀其誠為  
摹寫風旗雷車雨脚霧點晴未了便飛去硯坳有墨空  
淋浪願師騎之上帝都為問蒼生誰短長鳬眠鶴翥且  
莫辨伽那定裏松花香

悲歌一首寄呈劉學齋相執王可短張德昭二尚

書周雪坡太監王本中經歷貢吉甫司業宇文



子真助教危太樸待制貢泰甫授經陳元禮孝  
廉列位

天星曾照遂昌山人家隱約木石巖巖間真元丞相有  
支裔避地東入浙甘與猿猱麋鹿老死不復還五季閩  
王鄭光祿至今拱木斬伐後尚爾青珊珊使不念鄉井  
俯仰應厚顏其如貧病日零落每企予望涕泣長潸潸  
僑吳三十載惟餘此心在豈惟讀書老無成但覺出門  
俱有礙三兒兩病一凡劣四體三完百崩敗貸粟方炊

薪水艱僦屋屢遷家具壞文章出售有誰收書籍縱沽  
無可賣此心獨存何所似夜夜長虹發光怪青雲故人  
祿萬鍾不割少許俾饑窮忍令江南秋雨夜頽垣腐草  
唬寒蛩

送性僧遊徑山

憶昔茗溪登徑山童孩無識空躋攀但見五峰削玉倚  
天外兼聞衆木戛樂下雲間振威何人喝石裂行脚有  
僧挑月還神龍依禪井水立杜鵑唬血春花殷孤煙中

分白窈窕一雨忽洗青嶺顏何時復至舊遊處行蹤應  
有蒼苔斑願從師去不可得起看蘿月空鸞鸞

朱澤民畫

窈窕溪橋路陰森楓樹林岸隨青嶂轉家在白雲深畫  
史分明意山人去住心勞形何日已於此欲投簪

徐良夫耕漁軒遊題

幽館夏初度清林暑氣中開軒對流水坐石待薰風花  
落烏巾側鳥嘯山几空耕漁者誰子散髮奏絲桐

贈薛相士

子有唐生術誰如范叔寒知無狼顧骨可有鵝皮冠野  
日晴猶嫩春泥曉未乾多君遠相顧不用畫灰看

飛龍亭

先帝潛龍日幽人待鶴時青山頻望幸琳館暫來娛寶  
篆黃金鼎恩波白玉卮天開六朝地花發萬年枝閃閃  
前星夜汪汪湛露私遠符天厯鳳先協石龕龜稽古開  
廷閣繡經出講帷方蒙宣室召忽抱鼎湖悲舊邸梅花

落新亭柳線垂至今思沛感時或下雲旂

送李舉人克明任教職

職教同時雨郎官等列星吳區都水監閩國道山亭兩  
地頭逾白諸公眼為青身名金玉質文采鳳凰翎鼓枻  
辭江郡攜書入漢廷河山秋肅肅宮闕曉冥冥夜月鴻  
遵渚秋風馬在垆李嶠初夢筆劉向老傳經樸槭材千  
尺菁莪翠一庭天邊期中鵠囊底任枯螢歸路梅花發  
長歌為子聽

送貢司業泰甫

代祀躬趨黃水灣歸朝仍綴紫宸班識高京兆囊封後  
道在河汾戶屨間迎日講筵瞻鳳扆籲天經術動龍顏  
異時歸定藏書穴好在南湖疊嶂山

錢道士游仙

綠髮飄蕭禮上玄明星遙隔絳河邊香銷楚澤春風佩  
愁入湘娥夜雨絃素手不將條脫贈綺疏惟把步虛編  
西神峰頂飛霞觀小駐鸞笙五百年

至元丁丑夏五宣城汪叔敬吳人干壽道丹丘柯  
敬仲國人泰兼善同僕遊天平次往靈巖有作

奉和二首

西望層巒草木青魏公祠下拜儀刑經綸有策迴天地  
憂樂無時忘闕庭異代烝嘗遵典禮故山香火下神靈  
浮雲變滅知何在閒聽松風語埴鈴

天平魏  
公祠

吳王宮闕草萋萋飛閣重登意轉迷洗硯池邊雲欲暝  
拜郊臺上日平西湖涵遠浪千帆沒樹響悲風一鷗栖

江海鷗夷招不返  
荒煙野水鷓鴣啼

靈巖涵空閣

送樂鼎儀歸東平

岱宗高入帝青寒  
策馬東歸不厭看  
一變便興周禮樂  
兩生那識漢衣冠  
雨休樹下碑仍在  
雲起封中玉未刊  
更上靈光殿基望  
冥冥鴻鵠有修翰

和薩天錫留別張貞居寄倪元鎮

梁溪歲莫若為情  
溪上梅花待曉晴  
逕雪冷埋山屐齒  
簷冰夜墮石牀聲  
內篇攜向松根讀  
如意持將竹裏行



短晷何能理幽事南窗翦燭話寒更

歲莫感事

歲除風雪苦陰寒民庶逋租悉繫官破蕩未克狼虎欲  
條累只作馬牛看何人肯破陽城械有客空彈貢禹冠  
上力已窮民力瘁腐儒頭白淚闌干

天池

立石如雲不待鞭兀臨池水看青天下潛靈物疑無底  
傍漑山畦似有年刺水翠苗霜後在舞風珠樹月中懸

太湖萬頃應凡濁閱此泓渟一勺泉

次韻劉憲副春日湖上有感四首

庾信哀多賦漫成江南文物久晨星市衢火後蒿橫目  
民舍春來草滿庭浪齧湖隄官柳盡沙填江浦夜潮腥  
歸來何異遼東鶴只有西山慰眼青

湖水西邊舊是家春風繞屋種梅花傳聞故老談前日  
愛教仙人服幼霞鶴老離巢松化石鸞孤照水竹穿沙  
只今重到經行處憔悴蕭郎兩鬢華

潮落空城誰重過猶餘里耳聽鳴珂襄陽耆舊知誰在  
江左風流不厭多自見石麟眠枳棘長聞蜀魄叫松蘿  
野梅開盡西湖雪萬斛春愁奈爾何

湖水荒荒寒食天相逢猶話國初年紅樓夜唱花間席  
翠管春吹月下船玄圃自應留富麗湘雲誰為惜清妍  
可憐頭白歸來日井邑淒涼藹白煙

送劉宗師入覲次虞學士韻

羽輪暫別大茅峰又御青冥萬里風月帔引朝宣德殿

雲韶賜宴集靈宮懸知漢室龍顏主似見商巖鶴髮翁  
便使圖形在麟閣閒心只愛白雲中

梧桐月

露下秋陰洗夜光  
輓轡哀響度銀牀  
蒼龍出井獻沈璧  
青女抱琴彈履霜  
鵲遠暗知河漢近  
鳳棲明見羽毛張  
寶釵擊罷宮娥老  
一曲霓裳淚數行

次韻吳宗師題大滌洞郎師房

一菴閒地足神仙  
能駐人間大小年  
赤鯁夜飛丹井月

紫鸞春步木苗田山經我欲紬金匱晝漏時間滴寶蓮  
便駕飈輪上天柱不辭身倚帝青邊

贈張月庭道士

為愛中庭月一方坐看河漢轉蒼蒼山河影在無圓闕  
刻漏聲中有短長靈藥杵風金兔伏桂花霏雪綵鸞翔  
廣寒原是棲真地歌引霓裳入醉鄉

杭州即事二首

瓦礫堆堆塞路坳勝遊巷陌盡蓬蒿祠宮地卧駝鳴圖

祕殿春局馬矢臊山色無如今度慘潮頭可似昔時高  
王師貴在能安集豈必兵行血漬刀

往來都是石尤風身境俱忘逆順同鏡裏轉增雙鬢白  
花前仍是小桃紅莫驚天地軍麾滿尚喜江湖客櫂通  
楊柳吹絲春又莫賦詩愁殺杜陵翁

楊鐵崖新居書畫船亭

草玄心苦意如何樣岸舟輕不動波聽雨夜篷燒燭短  
截雲湘竹噴愁多賦成猶夢橫江鶴書罷應籠汎渚鵝

想見後堂涼月夜彭宣腸斷雪兒歌

春遊石湖

越來溪上水融融閒鷺鷥夷榼底風暖霧黃消治平寺  
燒痕青入館娃宮笙歌作樂年年少魚鳥關情處處同  
弔古從來易興感尚循華髮繫孤蓬

遊支硎南峰

詞客幽尋勝洞庭神僧名跡在支硎馬騎仄徑猶存石  
鶴放顛崖尚有亭巖底泉飛輕練白峰頭龕蝕古苔青

到來頓醉紅塵夢萬樹松濤沸紫冥

六月六日初度有感

三十六陂空似昔荷花荷葉待誰看星辰不合躔龍尾  
性命何嫌似鼠肝磐石處安心不轉蓼莪纔說淚難乾  
晚來惟有牆頭月依舊清輝照鵷冠

寄雲南蕭元帥

南望元戎玉帳寒炎炎桂海息狂瀾牽獅入貢金連索  
騎象來朝蜀織鞍丞相渡瀘先鬢白將軍標柱獨心丹



春波涸盡思霖雨箕畢星躔夜夜看

顧氏綠陰亭

顧家亭子綠陰陰楊柳荻蒲岸岸深鷺下積陂明霽雪  
鶯啼叢薄度鎔金涼雲覆地苔粘屐疎雨沾衣露滿襟  
境曠始知清晝寂舟行忽見白漚沈錦香承宇花如霧  
星采當階月在林荷鑊課童栽藥物開窻傍水候跂音  
湛癡元自能談易嵇鍛何妨善鼓琴況是松醪釀初熟  
公餘莫厭客同斟

渡江

突起金鰲玉作圍，天於設險出神機。  
衆流不息朝宗意，元氣長浮落日輝。  
雲葉暗吹神女珮，浪花應溼定僧衣。  
魚龍不礙中流舞，鴻鴈能忘北首歸。  
桃葉翠顰楊子渡，麥苗青茁蒜山磯。  
不因慷慨投鞭衆，自是艱危擊節稀。  
總會華夸民阜雜，分征玉帛使舟飛。  
射蛟人去空英傑，化鶴仙來歎是非。  
西日柁樓仍浩浩，南冠鬢髮故依依。  
書生閉戶堪終老，跋涉何勞與命違。

書畫舫小集分韻得春字

并序

久以物景艱棘不到界溪溪之上顧君仲瑛甫  
讀書績學尊賢好士當太平之時無事不過從  
也睽違幾年近以嘉平之三日扣君之扉荷  
君留連不忍言別已而河東李君廷璧甫亦拏  
舟來訪遂置酒書畫舫夜參半酒已酣折杜律  
句春水船如天上坐老年花似霧中看平聲字  
為韻人各賦詩而俾遂昌鄭元祐為序因拈得

春字李君得船字餘各以坐次分韻而賦云

雪舫夜寒虹貫日溪亭臘盡柳含春將軍結髮開全武  
隱者逃名媿子真醉裏都忘詩格峻燈前但愛酒盃頻  
毫羹青點沿牆薺斫繪冰飛出網鱗稽古尚能窺草聖  
送窮端欲致錢神周南老去文章在同谷歌終手脚皴  
獨黿歸來還自笑聞雞起舞意誰嗔盍簪豈料有今夕  
明日桃源又問津

朱澤民山水

吹簫江浦秋舟蕩碧雲幽擬遡巖松下詩盟訂白鷗

岳生畫竹

修篁含雨餘枝拂清風起埽破碧玲瓏高堂淨如洗

雲林小景

雲起野橋西層峰翠隔溪欲尋清閬閣古木亞簷低

王元章梅

明月西湖上清光儼舊時東風露消息香雪滿南枝

謝太傅像

秦兵百萬壓東南  
宗社安危已獨擔  
却寘捷書碁局底  
諸君猶認罪清譚

陶靖節像

裏裏慚無博浪槌  
酒醒空賦穉桑詩  
悲涼一曲山陽笛  
滿眼山河是義熙

寄金山普衲

金鼇背上鬱藍天  
長有神龍衛法筵  
午夜江聲推月上  
浪花如雪寺門前

子昂臨東坡竹

戲墨王孫似子瞻  
雞棲石上著  
參參汴京回首西風急  
流落江南共海南

月夜懷十五友

并序  
錄八

庚寅中秋夜月色如畫而貧居溪渚因念晉人  
云感念存沒心焉如割遂用東坡明月明年何  
處看詩平韻賦詩懷友云

趙宛丘

剡剡台躔映五雲通明殿上玉宸君  
今宵賞月延秋桂  
滿裏天香不見分

張貞居

月華浮海綠煙收曾照神光湖上樓  
惆悵塵生白玉塵  
詩盟從此負閒鷗

李雲中

屋角冰盤擁爛銀清光千里不疎親  
棄官歸去輕如葉  
應念滄江有釣綸



倪雲林

覽古樓高桂影寒飛觴不厭接清歡  
天香落盡黃金粟  
軟語何由接夜闌

泰白野

天章閣下月孤明仍是中秋此夜情  
便到蓬萊宮裏住  
謝安元自念蒼生

草堂賓主

芝雲如蓋擁冰盤攜得王珣午夜看  
山色湖光秋十里

詩成應更刻琅玕

陳敬初兄弟

闔閭城裏寄閒身  
四壁秋蛩語近人  
何異京華舊時月  
清光相照白頭親

王季野錢伯行

飛雲樓上月華明  
幾度中秋在帝京  
却有錢郎揮翰手

倚闌橫笛最含情

題稱十五友而詩止十二首者以玉山賓主敬初兄弟及王季野錢伯行

二人各一詩也所錄八首外尚有張文德劉張掖黃金華張京兆四人云

送僧還開先

廬山面目翠千層飛屨孤禪不厭登  
絕頂倚雲無脚力  
潭珠三伏灑寒冰

王元章梅

孤山無復有梅花寂莫咸平處  
士家留得王髯醉時筆  
歲寒仍舊發枯槎

館娃宮圖

複殿迴廊繞翠岑鴛鴦嬌擁畫屏金  
漫誇歌舞留君醉

千古人猶怨捧心

揩癢馬圖

啄瘡烏去未斜陽雨足春隄草正長  
摩擦樹根休揩癢  
明朝要爾戰沙場

竹枝詞二首

岳王墳西是妾家望郎不見見棲鴉  
孤山若有奢華日  
不種梅花種杏花

青青兩點海門山郎去販鮮何日還  
潮水便如郎信息

江花恰是妾容顏

學詩齋聯句

并序

至正甲申蜡月望前二日句曲張外史天雨自義興  
道吳還錢塘其老友某僑居吳中因宿外史于客棧  
時吳興鄭韶九成亦在焉予舊嘗喜與外史聯句是  
夜將為之而未得題韶作而言曰生以學詩名齋示  
有志于溫柔敦厚之教也儻二先生即是為題生幸  
多矣用一笑從其言詩將終而予怯寒先就寢明日

外史亟歸且屬以足成之為之補就吳人陸友  
善隸韶乞寫二紙一張于齋一寄外史云

明良賡歌基猗那奏鼓始清廟殊雝雝祐赤舄固几几

豈惟緇衣賢雨政以朱襮美原鵠兄弟急祐河魴父母

通便施谷中葛祐亦采體下菲咏桑表沃若雨歌萊賦

樂只祐暴譖蘇公絕祐厲懷凡伯恥思鳴卷阿鳳雨願

繪衮衣雖祐蔽以思無邪毋曰鼠有體雨言超授簡貢

祐道在過庭鯉雨遂去文辭害亦屏訓詁昧譎諫主風

刺

祐

昌言發興比雅亡繼麟筆

韶

和寡續巴里鎬罷魚

在藻屈倡鳧汎水

雨

絃誰與奏補笙自難擬哀哀河

梁別

祐

堂堂沛風起

雨

祠雒悔心萌

祐

訣虞壯圖已塞

玆恨第鬱

祐

援桂懷藿靡便唬城上烏

雨

猶恨水中汙

祐

隆中抱膝想許下橫槊偉體要必中度

祐

葩正悉循

理

雨

響當貫珠串

祐

轍始輾車軌

韶

清圓斲冰苦

雨

脫

穎扣鐘喜

韶

無敵白乃聖有作甫良史

雨

險如橫空盤

突若破陣褫

祐

雕鏤百神困策役萬象靡

雨

爨桐聲玉

明廟樂厭石齒揮毫既凌厲賦物斯須委祐郊公學方

篤吳歆好誠鄙

雨

蕭齋扁佳名華構落新址詩律妙獨

造吏塵淨一洗瑰辭出語穿遺經貯腹笥祐道在用服

形神悟為洗髓

雨

不虧素王造信全幽人履腎胃苦指

擢物累困成毀直登陶韋奧旁摩鮑謝壘馘凌天策燉

古偕靈光歸請驗百世傳致慎一匱圯兩老皆苦心六

義始盈耳挂一真漏萬

祐

聊以示吾子

雨

送章高士入閩兼簡杜清碧先生

以下玉山雅集補入



風日晴縑楊柳青翩然獨鶴過南溟山中每憶羅公遠  
海上重逢武達靈榕葉擁雲山侶簇蠟房烹玉酒初醒  
小冠子夏如相問為話窮愁老一經

次韻錢伯行游仙體二首

海定神風湛綠羅仙人辭藻寄來多貫珠音在雲誰遇  
琢玉文成手自磨憶昔絳河輕就別至今黃竹不成歌  
可憐人世書裙手池上猶籠道士鵝

軋軋青牛礙度沙煌煌白兔豈無家肉生徐甲符難秘

斧鉞吳剛桂始華  
諦授寶書盟刻玉  
醉離瑤席舞傳芭  
竹宮望拜真癡絕  
日日鼉光在景霞

送蕭萬戶還蜀二首

萬里乘輶出帝京  
涉波南海斬奔鯨  
回轅不困壺頭役  
載未來尋谷口耕  
尚可班荆談智略  
何嫌拾芥取功名  
卧吹簫管揚州去  
莫遣春愁白髮生

總戎西蜀幾經年  
從事誰令爾獨賢  
躍馬莫矜橫槊賦  
聞雞不道枕戈眠  
韜藏寶劍塵生匣  
愛惜瑯弓夜弛弦

歸到閬州三月盡江花如錦照鞍韉

寄張伯雨

露冷玄洲草樹疎硯泉分得礪循除鉤提石記修人表  
筆削山經作志書丹鼎曉溫松葉酒茶甌春點菊苗茁  
殘骸若有登真分亦欲西游候羽車

送毛彥昭歸三衢

載雪曾過太末溪天寒砂石淨無泥碓舂白粲連灘響  
橘熟黃香壓樹低水驛燈明驚見鴈篷窗酒醒忽聞雞

龜峯記在君歸讀異日春風聽馬蹄

題蘇武牧羊圖

飛鴻歷歷度天山何處孤雲是漢關  
不滴望思臺上血君王猶及見生還

周左丞伯琦

伯琦字伯溫饒州人集賢待制應極之子自  
幼隨父宦遊京師入國學為上舍生以蔭補  
南海簿三轉為翰林修撰至正間令南士得

居省臺除兵部侍郎遂與貢師泰同擢監察御史兩人皆南士之望時論榮之十四年起江東肅政廉訪使寧國陷改調浙西十七年行省丞相達實特穆爾承制假參知政事招諭平江張士誠拜江浙行省左丞留平江者十餘年除南行臺侍御史不赴張氏亡乃歸鄱陽尋卒所著有六書正譌說文字原及詩文稿若干卷伯溫別號

玉雪坡真逸儀觀溫雅尤善篆隸書法至  
正初元改奎章閣為宣文閣藝文監為崇  
文監伯溫遷授經郎命篆宣文閣寶仍題  
扁於閣摹王右軍蘭亭序及智永千文刻  
石閣中自是累轉皆在宣文崇文之間故  
近光扈從兩集其寵遇隆渥可證也及被  
留吳中張氏為造第宅於乘魚橋北厚其  
廩給日與諸文士以文墨留連因亦忘歸

明太祖平吳元臣之用事於吳者多被誅戮而伯溫與陳敬初俱獲免敬初以廉謹見容而史稱伯溫遭時多艱善於自保良不虛云

次韻王師魯待制史院題壁

大安御閣勢岵亭華闕中天壯上京虹繞金隄晴  
浪細龍蟠粉堞翠岡平衆星拱北乾坤大萬國朝  
元日月明分署玉堂清似水簫韶時聽鳳凰聲

歲庚

辰四月廿七日車駕北巡次大口有旨伯琦由編修  
官陞除翰林修撰同知制誥兼國史院編修官明日  
署事扈從上京

### 宮詞四首

畫閣香銷暮雨晴珠簾半捲遠山明蒲萄初醒羅衣薄  
枕上鷗絃撥不成

木難火齊當纏頭貼地金蓮步欲羞露溼銀牀人語靜  
蟾宮九夏是中秋

巫山隱約寶屏斜朝著重綿晝著紗徙倚牙牀新睡足



二瓶芍藥當荷花

苑路東西草色遙，闌干曲曲似飛橋。  
水晶殿外檐鈴響，疑是鑾輿蚤散朝。

上京雜詩二首

省方繩祖武，清暑順天時。  
法從嚴番直，周廬肅羽儀。  
攬輿駝背展，匱匣馬頭垂。  
惟有都人士，長望雨露私。

卑溼如吳楚，雄嚴軼漢唐。  
土牀長伏火，板屋頗通

涼菌出沙中美椒生地上香忘歸江海客直欲比  
家鄉

詐馬行

并序

國家之制乘輿北幸上京歲以六月吉日命宿衛大  
臣及近侍服所賜只孫珠翠金寶衣冠腰帶盛飾名  
馬清晨自城外各持綵仗列隊馳入禁中於是上盛  
服御殿臨觀乃大張宴爲樂惟宗王戚里宿衛大臣  
前列行酒餘各以所職敘坐合飲諸坊奏大樂陳百

戲如是者凡三日而罷其佩服日一易大官用羊二千  
數馬三匹它費稱是名之曰濟遜宴濟遜華言一  
色衣也俗呼曰詐馬筵至元六年歲庚辰忝職翰林  
扈從至上京六月廿一日與國子助教羅君叔亨得  
縱觀焉因賦詐馬行以記所見

華鞍鏤玉連錢駒彩暈簇轡朱英重鈎膺障顧鞞鏡叢  
星鈴綵校聲瓏瓏高冠豔服皆王公良辰盛會如雲從  
明珠絡翠光龍蔥文繒縷金紆晴虹犀毗萬寶腰鞵紅

揚鑣迅策無留蹤一躍千里真游龍渥注奇種皆避鋒  
藹如飛仙集崆峒垂鸞跨鳳來曾空是時閭闔含薰風  
上京六月如初冬金支滴露冰華濃水晶殿閣搖瀛蓬  
扶桑海色朝曈曈天子方御龍光宮袞衣玉璫回重瞳  
臨軒接下天威崇大宴三日酣羣惊萬羊鬻炙萬甕醲  
九州水陸千官供曼延角觥呈巧雄紫衣妙舞腰細蜂  
鈞天合奏春融融師獐虎嘯跳豹熊山呼鼇抃萬姓同  
曲闌紅藥翻簾櫳柳枝飛蕩搖蒼松錦花瑤草煙茸茸

龍岡拱揖灤水漑當年定鼎成周隆宗藩磐石指顧中  
興王彝典歲一逢發揚祖德并宗功康衢擊壤登時雍  
豈獨耀武彰聲容願今聖壽齊華嵩四門大啓達四聰  
臣歌天保君彤弓更圖王會傳無窮

七月十二日奉詔以香酒賜曲阜代祀孔聖廟越  
五日別翰林諸友

分班扈蹕到灤京侍從官閒暑氣清聖主素知吾道重  
頒香特遣孔林行中原廟貌山川古萬代綱常日月明

虔祀歸時迎大駕共陳經術贊承平

八月六日丁亥釋奠孔子廟三十韻

闕里宣尼宅儒林禮樂區右文昭代盛報德聖恩殊天  
語頒中禁星輶發上都內廷香繞案光祿酒浮壺持節  
慙專對于原慎載驅秋陽稀稼穡畫路足槐榆歷歷由  
沂汶行行望泗洙岱宗標近甸魯殿沒荒蕪不見三家  
采唯餘五父衢祀嚴柔日逼林近絕晨趨廢堞依脩阜  
危臺記舞雩廟宮參象緯書閣壓城闍反宇周阿峻迴

廊百步紆蛟鱗蟠玉柱螭首響金鋪庭迴檜千尺壇虛  
杏數株省牲新雨霽釋奠舊章敷開戶陳籩俎登歌應  
瑟竽尊居玄聖儼侑食列賢俱興俯銷珩珮周旋謹復  
絢裸將宸意達祝告下誠孚明燎輝雲陞祥熏集寶爐  
共觀周典禮寧數漢規摹似續於今盛欽崇自古無繚  
垣隆象魏穹石峙龜趺孤閣青編貯雙亭翠竹扶山川  
光拱揖泉井澤沾濡推本尊師道題名述廟謨佇看茂  
束帛豈復數乘桴制作先東魯朝廷用大儒愚生汲有

幸歸上孔林圖

至正元年復科舉取士制承中書檄以八月十九  
日至上京即國子監爲試院考試鄉貢進士紀事  
上國興王地神州避暑宮規摹三代廓聲教萬方隆至  
正儒科復留司造士充周南麟趾厚冀北馬羣空積雪  
寒無夜清秋月正中氈圍環壁水彩筆扇祥風殿陳寧  
韜劍先登不待弓豹班開曉霧雉羽爛晴虹障候瞻鄒  
魯都人想錫豐簾分堂上下區列院西東副楮行鵝螳



絨名畫鳥蟲屬防周四署塗抹眩雙瞳理到無優劣辭  
修有拙工神明終日鑒造化四時公雒校稽魚豕銓題  
辨鷄鴻固知散繫博敢以贖爲聰天淨文星麗寒叔士  
氣叢臺萊浮渭洛杞梓出恆蒿偕計先章甫前驅軼小  
戎有人爭覩鳳何處兆非熊合志官聯樂連牀笑語同  
獸爐團炭熾魚燭綴花紅雕豆羞有炙金卮奉酪醕環  
廬帷毳罽侍史服貂鼯局鐫虔朝莫閤兵慎始終更移  
壺滴漚衙報鼓籠銅事憶歐蘓遠詞懷賈董雄驛程心

歷歷雅奏日泐泐聖統乾坤久人文日月崇灤河天上  
出銀漢定相通

九月一日還自上京途中紀事五首

九月灤陽道寒煙暗遠坳有山皆積雪無水不成冰獵  
犬高於鹿鳴鴉大似鷹欲爲風土記問俗果誰馮

行宮臨白海金碧出微茫銅豹仍分署韓鷹亦有房射  
熊名鄙漢祝網德懷湯乾豆遵彝典人瞻日月光

龍門天下壯只尺異寒暄雲氣東西接泉聲日夜喧柳

榆環岸塹瓜瓞擁籬樊頗似燕南道農家各有邨

高嶺號槍竿危亭揭嶺顛四山皆培塿萬里盡平川草  
樹秋猶秀冰霜石半堅全燕歸眼底佳氣鬱中天

北口七十二居庸第一關峭厓屏列翠急澗玉鳴環佛  
閣騰雲霧人家結市闌馬前軍吏候使節幾時還

紀恩三十韻

并序

歲壬午四月三日上御宣文閣親試宮學弟子員講  
誦經史稱旨賜臣伯琦中統鈔五千貫弟子員繡衣

材各一謹賦長篇歌頌湛恩作

延閣曾霄上薰風九夏初北辰環象緯東壁爛宸居仙  
樂雕闌絢香蒲翠瑱虛屏翔金鷺鷺研倚玉蟾蜍怪石  
森峰巘飛鈴颯珮琚當陽咨岳牧稽古嗜詩書百揆敷  
言既重帷進講餘虎門承制綍鳳閣集冠裾黃卷陳香  
案青衿拜玉除唐虞彝訓闡周孔格言摠下濟天容懌  
淵居睿思紆菁莪演樂育棧樸廣涵煦鴻典張黌舍龍  
光照表著楮緡登上幣文綺出中儲聖德天同大奇逢

古不如侍貂咸贊慶陞戟總誇譽開館早瀛島榮儒陋  
石渠淪肌懷曠蕩撫已媿庸疎視學瞻周禮園門聽漢  
臚智崇羣辟聳聰達四門祛師道尊無上賢闕競樂昏  
垂旒端建極錫服執連茹瑞謀團雲露禎符驗罷車朝  
鳴阿閣鳳夕化北溟魚啟沃資嚴箴討謨起渭漁傳經  
後匡戴待詔劣應徐惟有呻佔畢何由效補苴文華歸  
藝苑治業本經畬四姓魁宗籍三雍在直廬小詩先舞  
抃佳氣正扶輿

三月七日廷試越三日奏進士榜名作

太平天子策賢良  
詔問天人白玉堂  
校藝盡遵周典禮  
策名寧數漢詞章  
風鳴松蓋宵聲殷  
雨浥梨花雪色香  
承乏幸陪諸老後  
凌晨金榜出明光

是年五月扈從上京學宮紀事絕句十首

曾覩複閣接青冥  
金色浮圖七寶楹  
當日熙春今避暑

灤河不比漢昆明

右詠大安閣故宋汴熙春閣也遼建上京

鏤花香案錯琳琅  
金甌葡萄大白浮  
羣玉諸山環御榻

瑤池只在殿西頭

右詠洪  
禧殿

睿思閣下瑣窗幽  
百寶明珠絡翠裘  
內署傳宣來準備  
大廷盛宴先初秋

數樹青榆延閣東  
雲窗霞戶綺玲瓏  
上林文鹿高於馬  
時引黃鸝碧草中

勝題仁壽睿思東  
星列鉤陳繡閣重  
中使三時羞玉食  
地涼不用暑衣供

冰華雪翼眩西東  
玉坐生寒八面風  
巧思曾經修月手

通明元在五雲中

右詠  
水晶殿

鷓鴣斑百和作堅材翥鳳翔  
龍四壁開寶地曉張香積界

始知天子是如來

右詠  
香殿

延閣圖書取次陳  
講帷日日集儒臣  
墨池雲合天光絢

東壁由來近北辰

右詠  
宣文閣

黉舍重開大殿西  
牙符給事籍金閨  
伊吾日課繙青簡

揮染還看寫赫蹏

北闕岧峩號穆清  
北山迢遞繞金城  
四時物色圖丹壁



翠輦時臨喜太平

賦得灤河送蘓伯修參政赴任湖廣

清灤悠悠北斗北千折縈環護邦國直疑銀漢天上來  
搖漾蓬萊雲五色蛟龍變化深莫測金蓮滿川淨如拭  
鑿與歲歲兩度臨雨露同流草蕃殖長亭短亭來往人  
朝夕照影何嘗息相君親授臨軒敕紫駟嚼齧黃金勒  
却從江漢望龍岡三疊晴虹勞夢憶

天馬行應制作

并序

至正二年歲壬午七月十有八日西域拂郎國遣使  
獻馬一匹高八尺三寸脩如其數而加半色漆黑後  
二蹠白曲項昂首神俊超逸視它西域馬可稱者皆  
在牕下金轡重勒馭者其國人黃鬚碧眼服二色窄  
衣言語不可通以意諭之凡七度海洋始達中國是  
日天朗氣清相臣奏進上御慈仁殿臨觀稱歎遂命  
育於天閑飼以肉粟酒湏仍敕翰林學士承旨臣巖  
巖命工畫者圖之而直學士臣揭傒斯贊之蓋自有

國以來未嘗見也殆古所謂天馬者邪承詔賦詩題  
所畫圖臣伯琦謹獻詩曰

飛龍在天今十祀重譯來庭無遠邇川珍嶽貢皆貞符  
神駒躍出西注水拂郎蕞爾不敢留使行四載數萬里  
乘輿清暑灤河宮宰臣奏進閭闔裏昂昂八尺阜且偉  
首揚渴烏竹批耳雙蹠縣雪墨漬毛疏駿擁霧風生尾  
朱英翠組金盤陀方瞳夾鏡神光紫聳身直欲凌雲霄  
盤辟丹墀却閑顧黃鬚圉人服龙詭譎鞚如紫相諾唯

羣臣俯伏呼萬歲初秋曉霽風日美九重洞啓臨軒觀  
袞衣晃耀天顏喜畫師寫倣妙奪神拜進御牀溪稱旨  
牽來相向宛轉同一人天閑誰敢齒我朝幅員古無比  
朔方鐵騎紛如螳山無氛祲海無波有國百年今見此  
崑崙八駿遊心侈茂陵大宛黷兵紀聖皇不却亦不求  
垂拱無爲靜邊鄙遠人慕化致壤奠地角已如天尺只  
神州首宿西風肥收斂驕雄聽驅使屬車歲歲幸兩京  
八鸞承御壯瞻視騶虞麟趾竝樂歌越雉旅獒盡風靡

迺知感召由真龍  
房星孕秀非偶爾  
黃金不用築高臺  
髦俊聞風一時起  
願見斯世皞皞如  
羲皇按圖畫卦復  
茲始

宣文下直

亭亭翠柏倚朱闌  
雲母窗扉逼暮寒  
玉德殿前紅杏樹  
數花猶作去年看

立秋日書事三首

大駕留西內  
茲辰祀典揚  
龍衣遵質樸  
馬酒薦馨香  
望

祭園林邈追崇廟祐光艱難思創業萬葉祚無疆

國朝歲以

七月七日或九日天子與后素服望祭北方陵園奠馬酒執事者皆世臣子弟是日擇日南行

鐵剝標山影金鋪耀日華龍迴秋歇雨燕落晝翻沙苑

御調驍騎宮官葺憶車長楊誰共賦滿耳沸寒笳

上京西山

上樹鐵旗竿高數十丈以其下海中有龍用梵家說作此鎮之

涼亭千里內相望列東西秋獮聲谷備時巡典禮稽犒

鳧隨矢落獬鹿應弦迷乾豆歸時薦康莊頌耄倪

上京之東

五十里有東涼亭西百五十里有西涼亭其地皆饒水旱有禽魚山獸置離宮處守至此歲必獵較焉

除夕偶成

十載清班客帝都  
溼煙破竈笑踈迂  
一寒范叔惟袍緼  
四壁相如少酒壚  
雪滿虛檐雙柏秀  
冰堅遠海萬林枯  
春風已到屠蘇畔  
明日堯樽徧九衢

過太行山

太行蒼翠插秋旻  
疊嶺重關自昔聞  
戰國東西分晉趙  
中原南北帶河汾  
帝王都邑青青草  
豪傑勲名點點墳  
鳥道盤空頻立馬  
便從高處望飛雲

七月七日同宋顯夫學士暨經筵僚屬遊上京西山紀事二首

聯岡疊阜衛神都萬幕平沙八陣圖朝市星垣周社稷  
宗藩盤石漢規摹官隄互野豐青草禁籞溪林暗碧榆  
地闢天開到今日九重垂拱制寰區

盤盤絕頂撫崢嶸目盡天涯一掌平海氣騰空搖鐵剝  
山風卷霧淨金城羈鷹秋健諸酋帳苑馬宵肥七校營  
相顧依然情未已攜壺明日約同傾



夏日閣中入直三首

金鋪蹲獸鑰銜魚，碧樹沈沈白玉除。  
留後命嚴番直肅，五雲深處掌圖書。

冰盤堆果進流霞，中秘繙餘夕景斜。  
畫舫逕從園殿過，鳳麟洲上數荷花。

流觴小殿曲闌紫，波影簾櫳浸繡楹。  
靜晝敲碁中貴語，君王避暑在開平。

宋陵

奉先橋畔政和碑種麥人家護棘籬絕勝望潮亭下路  
浮圖積雪浙江湄

渡揚子江泊京口

長江天塹控南州吳楚相望民物稠萬里風濤趨大海  
兩山巖壑障中流魚龍噴薄瓜州渡燕雀喧呼多景樓

闕

更須誇鐵甕清時久不識兜鍪

二月廿六日到會稽明日代祠南鎮題飛流亭

會稽山水名天下南際滄溟北枕江碧嶂千重盤洞府

鑑湖一曲帶藩邦漢唐疆域今無外王謝風流世少雙  
萬里藏祠竣使事飛流亭上聽淙淙

遊金山寺

江心一簇翠夫容金碧晶熒殿閣重隱士有緣來化鶴  
梵王無語坐降龍鐘聲兩岸占昏曉海眼中冷湛夏冬  
八十高僧供茗罷細談蘓米舊時蹤

遊焦山寺

涉江已閱裴公洞復訪焦先到此山險絕遠同巴蜀峽

歸然對峙海門闕神蛟戲浪時潛躍野鳥巢林自往還

建業青山廣陵樹開軒盡在酒壺間

裴公洞即金山寺  
蓋唐裴公所隱之

地石洞尚在焦山寺乃漢  
隱士焦先隱居之所也

### 黃河舟中對月

汎舟邈長河河急月色明南風導飛帆岸闊波濤平近  
林鳥雀棲遠岫煙靄生茲行道里遙已見草木更初春  
發燕轅首夏還江程祿班敢威遲官守常屏營何時歸  
計遂不爲世塵嬰

初秋同楊國賢太監咬住伯堅少監子貞監丞暨僚屬重汎湖遊西山

清商應候琯涼颼滌炎歊蘭臺多暇佚西郊共消搖凌晨拂星露適興寧辭遙稼寶豐黃雲擊壤喧髦鬢重巒霏溼翠澄湖瑩冰綃朱華擁綠衣弄影酣且嬌菰蒲漾藻影柳槐咽殘蛸樓船汎中流雅會崇風標華謳振遠樹妙舞驚潛蛟霽虹駕文漪飛閣摩曾霄登臨劇賞眺沿洄屢停橈累觴互稱壽氣合笑語饒微雲起天際疎

雨鳴林梢異芳襲四坐霧裏羣仙邀回頭擾擾中何啻  
萬仞超人生聚合難況際休明朝同班侍辟府我冠聽  
雲韶茲遊豈偶爾三生舊相招宛然在瀛島孰謂非松  
喬羊謝素曠達李郭真英翹歡惊各灑灑歸途盡陶陶  
攬勝猶未徧尋盟更聯鑣

紀事二首

并序

至正十一年歲辛卯二月一日天下貢士及國子生  
會試京師凡三百七十三人中書承詔校文取合格

者百人充廷對進士先二日鎖院凡三試每試間一日十有二日揭榜時叅政韓公伯高知貢舉尚書趙君伯器同知貢舉予與左司李君孟幽考試博士楊君士傑修撰張君仲舉同考試收掌試卷則典籍毛君文在也諸公皆翰苑舊游誠盛會也紀事奉呈

鳳皇銜詔下亨衢多士盈庭總八區北斗光芒明策府  
東風生意滿皇都墨池淨几環香鼎燭影疎簾聽漏壺  
拭目慶雲華穀旦敢令滄海有遺珠

禮聞半月得從容料峭春寒似早冬警夜每聞三弄角

論文直到五更鐘鴈來遠路驚流景草茁閒庭失舊蹤

得士共爲天下賀明朝揭榜醉黃封

二月十二日禮聞揭榜傳宣張宴各

賜衣帶勝魁曰李國鳳趙麟疏鳳麟勝又有三家兄弟聯中號棣萼勝皆前所未見也

紀行詩二十四首

錄十六以下扈從詩

乘輿繩祖武歲歲幸灤京夏至今年早山行久雨晴日  
瞻黃道肅夜拱北辰明隨步窺形勝周諏記里程

居庸東北路草細一川平夾岸山屏展穿沙水帶縈六



龍扶日御萬騎擁雲旌遊豫諸侯度歡歌兆姓迎

縉雲山獨秀沃壤歲常豐玉食資原粟龍州記渚虹荒

祠寒木下遺殿夕陽中誰信幽燕北翻如楚越東

右縉  
山縣

今名龍  
慶州

車坊尚平地近嶺盡生寒拔地數千丈凌空十八盤飛

泉鳴亂石危磴護重關俯視人寰隘真疑長羽翰

右十  
八盤

嶺

踰險夢頻悸循夷氣始愉千巖竒互獻萬壑執爭趨峭

壁劒門壯重梁皇渚紆凡鱗期變化雷雨在斯須

右龍門

嵐翠摩台斗林霏隱日車谷溪幽境迴路轉列峰斜錦石歌瑤草蒼叢綴白花柴門成聚落山崦盡人家

萬幕懸崖下高低疎復稠蜀牆聯虎衛帷殿聳龍樓榆柳清長畫槐松颯早秋威容隆古昔神武鎮中州

高嶺橫天出炎天氣候涼白沙溪沒馬碧草淺連岡晨服增繇纊寒鄉貴稻粱土風多國語閭井異尋常

晴川平似掌地勢與天寬煙草青無際雲岡影四圍

貅環武陣麟鳳擁和鑾高獻南山壽同承湛露歡

右沙嶺二

首是日上都守士官  
遠迎至此內廷小宴

嶺西通驛傳山盡見郵亭萬竈閭閻聚千轅驃騎營市

樓風策策野堠霧冥冥雄略早秦隴孤兵笑廣青

右牛羣頭

涼亭臨白海行內壯黃圖貝闕明清旭丹垣護碧榆龍

湫時霧雨鷹署世衡虞駐蹕先軌長楊只一隅

右察罕諾

爾猶漢  
言白海

地曠居人少山低雲影微石牆蟲避燥土屋燕交飛沙

淨泉宜酒天涼秋合圍朔方戎馬最芻牧萬羣肥

右明安驛

漢將荒臺下灤河水北流歲時何哀哀風物尚悠悠川

草花芬郁沙禽語滑柔莫梁遺句在過客重綢繆

右李陵臺

桓州富孔道城禁自唐時翊輔千年盛川原萬里夷草

滋新雨歇雲起遠山移迎送官僚習長懷被眷私

右桓州古

鳥丸地也

南坡延勝緊一舍抵開平地蘊清涼界天開錦繡城雷

轟駝鼓振霞絢象輿行填道都人士瞻前戴聖明

右南坡

巡守綏畿旬游從覽近風山川隨地異聲教此時同王  
業難遠神都制作雄按行循故事不用避青驄

至正十二年四月伯琦由翰林直學士兵部侍郎拜  
監察御史視事之三日大駕北巡上京例當扈從啟  
行至大口留信宿歷皇后店阜角至龍虎臺皆巴納  
猶漢言煩宿所也龍虎臺在昌平境又名新店距京  
師僅百里五月一日過居庸關而北遂自東路至爰  
山明日至車坊在緡山縣之東沃衍宜粟歲供內餽  
又明日入黑谷過色澤嶺高峻曲折凡十八盤遂歷  
龍門及黑石頭過黃土嶺至程子頭又過磨兒嶺至  
胡家營歷白塔兒至沙嶺自車坊黑谷至此凡三百  
一十里皆溪林複谷邗陂僻處山路將盡兩山高聳  
如洞門尤多巨材近沙嶺惟土山連亘地皆白沙溪  
沒馬足過此則朔漠平川如掌天氣陡涼風物大不

同矣遂歷黑嘴兒至矢巴爾圖地多泥淖又名牛羣  
頭其地有驛有郵亭有巡檢司關閘甚盛驛路至此  
相合北皆易牧之地無樹木徧生地椒野茴香蔥韭  
芳氣襲人草多異花五色有名金蓮花者似荷而黃  
至察罕諾爾猶漢言白海也水潔淡不可測氣昏白  
霧其地有行在宮曰亨嘉殿闕廡如上京而殺焉置  
雲需總管府以掌之沙井甘潔釀酒以供上用又作  
土屋養鷹名鷹房駐蹕於是秋必校獵焉此去巴納  
曰鄭谷店曰明安驛泥河兒曰李陵臺驛雙廟兒遂  
至桓州曰六十里店即烏九地也前至南坡店去上京  
一舍耳以是月十九日抵上京歷巴納凡十有八爲  
里七百五十有奇爲日二十四抵兩都相望不滿  
千里往來者有四道曰驛路曰東路二曰西路東路  
二者一由黑谷一由古北口古北口路東道御史按  
行處也伯珣往年外署上京但由驛路而已黑谷輦  
路未之前行因忝法曹肅清轍下遂得見所未見實

為曠  
過云

懷圖諾爾作

漢言後  
海也

侵晨離白海輦路轉西邁野光散平蕪山容列修黛秋  
風動地來曾波忽澎湃戎馬多驚嘶寒聲襲鞞帶踰岡  
覽晴川夷曠襟抱快白花間紫蕤將將委珩珮幽興足  
目前絕境疑方外旌麾匝雲屯輿帳擬行在法從各有  
司諫垣敢荒急遽報叢遠函蒼黃盡吁怪解鞍惕前邨  
伏枕念當代王綱未旒綴羣生丰塵芥紆軫誰與言沉

思屢長嘯東南何時蘇吾欲問大塊

是日驛報杭省有警

死央灤作

官路何逶迤里數不可度宿止有常程晚次死央灤山  
低露草溪天朗雲氣薄積水風颭颭平沙煙漠漠鳬鷺  
雜翔集巨鱗倏潛躍居人歲取給遠眺近一勾原隰多  
種蓺農奚犬牙錯滌場盈粟麥力穡喜秋穫舒徐八駿  
遊相羊瑤池樂山川豈不佳人事日蕭索芻牧紆邦供  
征徭非昔作都人望翠華朝朝候靈鵲



興和郡

屬河東憲司按部西抵太原千餘里

我行已旬決所歷皆朔漠興和號工郡陂陀具城郭灤陽界東履汾晉直西略提封廣以遐編氓半土著連費結賈區曾樓瞰寥廓要會稱雄麗執壓諸部落興王遠垂裕百載承制作北巡必西還遠儼東邑洛供億須浩繁撫循在恭恪四鄰慎備虞三輔嚴寄託賢愚不同調蟲沙與援鶴長願四海清漢儀歲輝爍

野狐嶺

嶺界南北甚寒南下平地則暄矣

高嶺出雲表白晝生虛寒冰霜四時凜星斗只尺攀其  
陰控朔部其陽接燕關澗谷深叵測梯磴紆百盤坳坵  
草披拂崎嶇石嶺屹輪蹄紛雜還我馬習以安恍然九  
天上熙熙俯人寰連岡束重隘拱揖猶城垣停鞭履平  
地回首勢望尊繇衣遂頓減長途汗流鞵亭柳蔭古道  
園果登御筵境雖居庸北物色幽薊前始悟一嶺隔氣  
候殊寒暄小邑名宣平相距兩舍間牛羊歲蕃息土沃  
農事專野人敬上官柴門莫款延休養嘉承平禹迹邁

古先漢唐所羈縻今則同中原大哉輿地圖垂創何其  
難張皇我六師金湯永溪堅

自順寧府歷坳兒領臨渾河上源過雞鳴山晚宿  
雷家驛

郡治頗清曠民俗亦樸淳川原西成饒景物娛征晨登  
頓未及晡修領忽前陳亂石森礪礪濁流奔沄沄斗厓  
鳴瀕洞險逕緣鄂齷園林暗回隄峰巘排秋旻海鵬奮  
凌風江蛟歟乘雲雞鳴俗語傳世遠昧所因招提據危顛

略闕

天津睥睨窮豪芒翕忽叢鬼神六龍行中天壯  
觀齊崑崙造設開闢先顯耀當茲辰垂髻耳已熟華顛  
目方親甚欲恣冥搜赤日昏黃塵紀勝猶挂漏觀風能  
宣旬

懷來縣

山風日多寒近燕苦秋陽懷來雖小縣肇置自李唐泉  
甘沙井冽橋古川流長重岡相抱環遠山勢低昂鑿與  
歲西還傾朝迎道傍蟠桃百寶盤敬上萬年觴三登調

玉燭羣黎樂康莊吾皇仁聖君動必循彝章宵旰貽近  
憂苗頑尚跳梁所賴根本固忍此枝葉傷思見萬邦寧  
野無遺賢良

榆林驛

漢史稱榆谿  
長塞即此也

昔人多種榆今人惟種柳堅脆雖不同氣盡同一朽此  
地名榆林自漢相傳舊但見柳青青夾路忘炎晝行旅  
蘇汗暍車騎藉陰覆培植將百年柯葉日滋茂驛亭當  
要衝人煙紛輻湊崇山峙東西步障明錦繡輦路中平

平形勝信天授宛如道衡廬中流望雲岫初夏別都城  
攀條集親友茲還秋將中涼颼滿衣岫物態有變容歲  
月如反手不問柳與榆生意要悠久

入居庸關

出關復入關五見月上弦草木雖未霜寒色已淒然厓  
路何紆縈疊嶂橫中天上有太古石下有無底泉幽致  
良足嘉萬雷奈喧闐馴象寶轡鳴紫駝錦幃鮮鐵騎簇  
雲隊黃屋循星躔時巡謚風俗執法恭後先達官國同

休拔宅如登仙細民終歲勞輸轉百苦煎苦樂殊雲泥  
使我中心悵偶經巖谷勝復憶江湖塢升高望白雲楚  
天浩無邊王師未休息敢賦歸來篇

龍虎臺

在昌平境北距  
居庸關廿五里

魏魏百尺臺蕩蕩昌平原隆隆鎮天府奕奕環星垣居  
庸互北紀隩區斂全燕倉龍左蟠拏白虎右踞蹲斯名  
豈易得天以遺吾元明明傳正統聖子及神孫巡歸遂  
駐蹕衣冠照乾坤山川皆改容草木亦被恩章華民力

竭柏梁侈心存豈若因自然張設一旦昏雄偉國勢重  
簡儉邦本敦年年舉盛典宮中奏雲門

大口

其地有三大垵土人謂之三疋疋距都北門二十里

三垵何崇崇遙直都門北天肅煙嵐青野迴露草白紫  
氣千里臨蜺旌拂秋色文武迨耄倪并舞拜路側萬羊  
肉如陵萬甕酒如澤國家富四海于以著功德詰朝御  
大明湛露春拍拍簫韶殷九天歡聲溢遠陌非才忝扈  
從所職陳典則皇基奠泰山億兆寃安宅



車駕既幸上都以六月十四日大宴宗親世臣環衛  
官於西內掖殿凡三日七月九日望祭園陵竣事屬  
車轅皆南向彝典也遂以二十二日發上都而南宿  
六十里店巴納越三日至察罕諾爾由此轉西至懷  
圖諾爾猶漢言後海也有大海在巴納後故云曰平  
陀兒曰石頂河兒土人名爲死夾濼其地南北皆水  
水禽集育其中國語名其地曰徹哩哈喇巴納猶漢  
言遠望則黑也兩水之間壤土隆阜諸部與漢人雜  
處因商而致富者甚多自察罕諾爾至此百餘里皆  
雲需府境也界是而西則屬興和路矣巴納曰苦水  
河兒曰回回柴國語名呼勒圖漢言有水濼也隸屬  
州保昌曰呼察圖猶漢言有山羊處也地饒水草野  
獸兔最多又西二十里爲興和路世祖所創置也歲  
北巡東出西還故置有司爲供億之所城郭周完闡  
聞叢影河東憲司所按部也西抵太原千餘里郡多  
太原人路置二監一守餘同他上郡東界則宣德府

境上都屬郡也府之西南名新城武宗築行宮其地故又名中都今多圯大駕久不臨矣由興和行三十里過野狐嶺上爲巴納地高風甚寒東南盤折而下平地天氣即恒無不減衣者前至得勝口宣平縣境也有御花園雜植諸果中置行宮南至縣十五里去邑三十里有山出瑪瑙石又前至沙嶺五十里至順寧府本宣德府也因地震改名南過坳兒嶺下臨溪澗其流爲渾河嶺頭參互四十里至雞鳴山疊嶂排空綿互二十餘里又南二十里乃平地曰雷家驛驛之西北十里巴納曰豐樂二十里至阻車巴納又二十里至統幕則與中路驛程相合而南歷狼居胥山至懷來縣四山環抱中有水名媯川縣南二里巴納也凡官署留京師者皆盛具牲酒於此候迎大駕仍張大宴慶北還也南則榆林驛即衛青傳榆谿蒿塞自懷來行五十五里至媯頭又十里入居庸關以至於大口遂以八月十三日至京師凡歷巴納二十


有四為里一千九十有五此輦路西還之所經也國  
制凡官署之幕職掾曹當尾從者東西出還甲乙番  
次惟監察御史扈從與國人世臣環  
衛者同東西之行得兼歷而悉覽焉

荅復見心長老見寄二首

浙水東頭佛舍連蒲菴上士坐忘年五雲古衲層瀾湧  
百寶浮圖列宿躔牀上貝書多譯梵門前海舶直通燕  
比丘喜得階蘭秀應種菩提滿法田

九載違離得遠書幾更歲歷斗旋樞華星秋月超元白  
峻嶺重江限越吳柏子樹陰浮碧砌蓮花漏水響銅壺

老夫素有林泉癖一曲何當乞鑑湖



元詩選初集卷五十二